



[Home](#) / [Habari](#) / ELIMU YA FEDHA KUPELEKWA VIJIJINI KWA NJIA YA WASANII

15 Jan, 2024



Afisa Msimamizi wa Fedha Mkuu kutoka Idara ya Uendelezaji wa Sekta ya Fedha, Wizara ya Fedha, Bw. Salim Khalfan Kimaro, akifungua mafunzo ya elimu ya fedha kwa Wasanii kutoka Shirika la Kijamii linalojishughulisha na utoaji wa Elimu ya Uraia (TACCI), yanayofanyika mkoani Morogoro, kushoto ni Mkurugenzi wa TACCI, Bi. Aline Augustin na kulia ni mtaalamu wa masuala ya fedha wa Wizara ya Fedha, Bi. Grace Muiyanza.

Wananchi wametakiwa kukopa kwenye taasisi za fedha zilizosajiliwa na kutambulika na Benki Kuu ya Tanzania au Mamlaka Kasimishwa kwa kuwa itasaidia kutatua changamoto zinazoweza kujitokeza kwa mkopaji kwa kuwa taasisi hizo zinaendeshwa kwa mujibu wa Sheria.

Rai hiyo imetolewa mkoani Morogoro na Afisa Msimamizi wa Fedha Mkuu kutoka Idara ya Uendelezaji wa Sekta ya Fedha, Wizara ya Fedha, Bw. Salim Khalfan Kimaro, wakati akifungua Mafunzo ya Elimu ya Fedha kwa Wasanii kutoka Shirika la Kijamii linalojishughulisha na utoaji wa Elimu ya Uraia (TACCI)

Alisema kuwa mkopaji anapaswa kuwa na elimu sahihi kuhusu huduma za fedha

na kusoma na kuelewa vyema mikataba ya mikopo ili kufahamu gharama halisi za mkopo na kuziafiki kabla ya kuchukua husika mkopo ili kuepuka kuingia hasara kwa kudhulumiwa.

"Mpango Mkoo wa Maendeleo ya Sekta ya Fedha, umeelekeza kutoa elimu ya fedha kwa umma kwa njia mbalimbali, hivyo mafunzo kwa wasanii yatawezesha kupeleka elimu ya fedha vijiji ambako kumekuwa na uelewa mdogo wa masuala hayo na kusababisha uwepo na mikopo umiza", alisema Kimaro

Alisema kuwa mwananchi anapokopa ni lazima ajue riba, ada na gharama zingine lakini pia mkopaji anapaswa kujua kiasi ambacho anatakiwa kulipa kwa kipindi chote cha mkopo.

Alisema kuwa Mpango Mkoo wa Maendeleo ya Sekta ya Fedha ni Mpango uliowekwa na Serikali kupitia Wizara ya Fedha katika kuhakikisha huduma za fedha zinaimarika, mitaji inapatikana na kunakuwa na Sekta ya fedha himili inayochangia ipasavyo kwenye pato la Taifa.

Bw. Kimaro, alisema kuwa program ya elimu kwa umma inatekelezwa kwa kipindi cha miaka 5 kuanzia 2020/2021 hadi 2025/2026 ikiwa ni utekelezaji wa Mpango Mkoo wa Maendeleo ya Sekta ya Fedha kwa miaka 10 kuanzia 2020/2021 hadi 2029/2030.

Alielea kuwa baada ya hapo Mpango Mkoo utafanyiwa tathmini ili kuona mafanikio yaliyopatikana katika utekelezaji wake na kuja na maboresho iwapo changamoto zitajitoeza.

Bw. Kimaro, alisema kuwa Sanaa ni eneo muhimu la kufikisha ujumbe kwa umma kwa kuwa ni rahisi kuwafikia wananchi na njia yenyeye mafanikio makubwa si tu kwa Tanzania lakini pia duniani kwa ujumla.

Alibainisha kuwa maeneo muhimu ambayo yataangaziwa wakati wa kutoa elimu ya fedha ni pamoja na usimamizi wa fedha binafsi, uwekaji wa akiba, mikopo, uwekezaji, bima, bima ya amana, mpango wa kijiandaa na maisha ya uzeeni, kodi, mifumo ya malipo na kuwalinda watumiaji wa huduma za fedha

"Tutaenda vijiji na tutachagua maeneo ambayo elimu ya fedha ipo chini baada ya wasanii kupata uelewa ili kupeleka elimu sahii kwa wananchi", aliongeza Bw. Kimaro.

Aidha, alisema kuwa mkopaji anashauriwa kukopa kwa ajili ya uwekezaji unaozalisha kama vile kununua sehemu ya ardhi ambapo atawezza kuzalisha mazao au kupanua biashara itakayomwezesha mkopaji kurejesha mkopo kwa wakati na kuweza kukopa zaidi baadae kama atahitaji.

Kwa upande wake Mkurugenzi wa Shirika la Kijamii linalojishughulisha na utoaji wa Elimu ya Uraia (TACCI), Bi. Aline Augustin, alisema kuwa upekee katika kuelimisha jamii ni matumizi ya Sanaa za maonesho jukwaani kwa ajili ya maendeleo ya jamii, kwa kutumia pia ngoma bila maneno na maigizo kwa njia ya redio.

"Kwa njia ya redio na ngoma TACCI, inakuwa na nafasi kubwa ya kuifikia jamii na kuperenyeza elimu na kuvutia watu wa makundi tofauti kwa kuwaleta pamoja na kuchochaea mazungumzo na majadiliano katika elimu inayotolewa", alisema Bi. Augustin

Aidha, alisema kuwa mafunzo ya elimu ya fedha yanayoendelea kutolewa yanawapa uelewa na wigo mpana wa kuanda elimu kwa njia ya sanaa itakayokidhi matakwa ya Wizara ya Fedha katika kufikisha ujumbe stahiki kwa wananchi hususani waishio vijiji.

Bi. Augustine, ameipongeza Wizara ya Fedha kwa kuamua kutumia sanaa kufikisha elimu vijiji na ameahidi kutumia mafunzo wanayopata kuongeza ujuzi na kuhakikisha elimu ya fedha kwa njia ya sanaa inawasilishwa kwa ufanisi na kwa tija.

Mwisho.

Wasiliana Nasi

Jamhuri ya Muungano wa Tanzania

Wizara ya Fedha

Treasury Square Building 18 Jakaya Kikwete Road

S.L.P 2802,

40468 Dodoma.

Barua pepe: info@hazina.go.tz

Simu: +255 26 2160000

Kurasa za Karibu

MOF Library

Misamaha ya Kodi

Taarifa kwa Vyombo vy ya Habari

Matangazo